

'Generasi Y' Bakal Tentukan Keputusan PRU-13
mStar Online
Jun 09, 2012
Oleh RAZAK AHMAD

PETALING JAYA: Empat daripada 10 pengundi baru didaftarkan adalah di bawah kategori 'Generasi Y' yang akan menentukan keputusan pilihan raya umum ke-13 (PRU-13).

Ekoran itu, Barisan Nasional (BN) mahupun pakatan pembangkang sedang berusaha keras untuk mendekati kalangan pengundi ini.

Daripada seramai 12,912,590 pengundi berdaftar di seluruh negara sehingga kini, 5,175,096 atau 40 peratus pengundi berusia antara 21 hingga 39 tahun.

"Generasi Y' merupakan mereka yang terdiri daripada kumpulan celik teknologi, dilahirkan antara 1980 dan 2000.

Generasi tersebut sering disifatkan sebagai 'berfikiran bebas dan kesetiaan politik mereka tidak tetap' kerana akses yang lebih luas kepada maklumat.

"Kebanyakannya merupakan 'pengundi atas pagar' yang akan membuat keputusan pada saat-saat akhir," kata pensyarah Universiti Sains Malaysia, Prof Madya Dr Sivamurugan Pandian yang melakukan kajian terhadap 1,500 pengundi muda baru-baru ini.

"Kedua-dua parti politik perlu mengerah tenaga untuk memikat hati pengundi muda ini."

Pensyarah Universiti Teknologi Mara, Prof Madya Shaharuddin Badaruddin berkata, pengundi yang berusia 40 tahun ke atas merupakan penyokong tetap atau sebaliknya sama ada BN atau pakatan pembangkang dengan kedua-dua parti memperoleh sokongan hampir sama.

Beliau berkata, generasi muda yang sebahagian besarnya adalah 'pengundi atas pagar' boleh menjejaskan keputusan pilihan raya kedua-dua parti.

Timbalan Pengerusi Suruhanjaya Pilihan Raya (SPR), Datuk Wan Ahmad Wan Omar bersetuju bahawa golongan tersebut tidak mengikut apa yang dikatakan orang lain. Jika seseorang melihat dari perspektif ini, maka pengundi muda mungkin menjadi penentu, walaupun tiada sesiapa yakin mengenai perkara ini."

Sejak 2008, BN dan Pakatan Rakyat sentiasa menarik perhatian pengundi 'Generasi Y'.

Bagaimanapun, kedua-dua parti dapat meramalkan dengan tepat kelakukan kumpulan ini semasa mengundi.

"Semua strategi dan polisi sejak 2008 sentiasa disasarkan ke atas pengundi muda."

"Sejak dari itu, kami menyedari bahawa kumpulan terbesar pengundi pada pilihan raya akan datang terdiri daripada pengundi muda," kata Ketua Pemuda Umno, Khairy Jamaluddin.

Beliau berkata, jumlah 'pengundi atas pagar' di kalangan pengundi muda kekal pada kadar tertinggi iaitu 65 peratus.

Undi 'Generasi Y' juga merupakan keutamaan untuk Pakatan.

Ketua Dewan Pemuda PAS Pusat, Nasrudin Hassan berkata 40 peratus daripada calon parti adalah berusia dalam lingkungan 30 hingga 45 tahun sebagai usaha untuk memancing pengundi muda.

"Pengundi muda kebanyakannya non-partisan, jadi kami perlu mendekati dan meyakinkan mereka bahawa kami adalah parti terbaik untuk mewakili mereka," katanya.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/6/9/mstar_berita/20120609095540&sec=mstar_berita